

炳

燭

齋

隨

筆

炳燭齋隨筆

海虞顧大韶仲恭父著

男

品公臣父校

古德云依經解義二世佛冤離經一字卽同魔說依
又不是離又不是必有不依而依離而不離者乎
知其解者可以作經義矣

雖有談天之口未有不始於學語者也雖有逐日之
足未有不始於學步者也故曰千聖之行始於足
下九層之臺起於累土可不勉哉

讀書當如蜂之釀蜜採百味消歸一味作文當如蠶

之作繭繰一絲便盡一繭讀書而但爲記誦之學
是智不如蜂也作文而但爲餽飣之文是智不如
蠶也

女必論色而後求貞焉無鹽嫫母相對而譚節烈人
有不失笑者乎士必論才而後求德焉惰農敗賈
相對而誇清貧人有不鄙夷者乎

釋存不昧之靈道存不亡之形儒存不朽之名此倪
思經鉏堂雜志中語也其言雖淺聖人不能易矣
又曰有福食福無福食智無智食力其言雖鄙聖

人不能易矣

讀類書文集而不讀子史是沽酒市脯之學也讀子史而不讀五經是拔本塞源之學也讀五經而不講理學不通三教是貧兒數寶之學也故曰博學而詳說之將以反說約也

王李之文大官之剩饌也其所自出者貴矣然而非其有也袁鍾之文清士之烹鮮也時或可於口然而不堪大嚼也以剩饌而欲詆自得之歐蘇曾王所謂蚍蜉撼大樹也以烹鮮而欲駕剩饌之王李

無乃一蠲不如一蠲乎

余偶讀天目集求一可喜之句而不可得也有文如此而自謂名家其心之死已久矣有文如此而謂之名家其友之心亦死已久矣

莊子女偶曰卜梁倚有聖人之才而無聖人之道我有聖人之道而無聖人之才我欲以教之庶幾其果爲聖人乎此語妙絕嘗推論之孔子有聖人之才而無以聖人之道告之者故發憤忘食終日終夜以思直至五十而始知天命顏子有聖人之才

而又得遇聖人故未滿三十而入聖域矣

盈天地間皆文也多聞而擇多見而識而一以貫之
文遂爲夫子之文矣故曰文不在茲乎仁人心也
惻隱之心人皆有之一日克己復禮而遂爲顏淵
之仁矣故曰天下歸仁焉古德有言不道無禪止
是無師元禪有言吾讀杜子美集而知詩人之才
有所統萃焉數語可以叅觀

老氏以爲自然而自然之故雖老氏不能言也佛氏
以爲因緣而因緣之始雖佛氏亦不能言也莊子

云季真之莫爲接子之或使卽此兩言如兩兒辨
日不可判其是非因緣自然之辨吾知與天地相
終始矣

用人之仁去其貪仁至公也貪至私也仁者而有貪
乎曰仁者之貪將以布施也故曰所識窮乏者得
我與此亦仁者之所不免也雖然其仁未至也夫
至仁者博施濟衆而不居其功一介不取與而不
諱其吝烏乎貪哉

嗇於己不嗇於人謂之儉嗇於人不嗇於己謂之吝

嗇於人并嗇於已謂之愛儉者君子之德也吝與愛小人之事也此言出於晏子如晏子者真能儉者也

晏子之儉嗇天下萬世之所共知也而父之黨無不乘車者母之黨無不足衣食者妻之黨無凍餒者嗇於已而豐於人所以爲賢也范希文之方嚴天下萬世之所共知也而取人不棄瑕累不拘形迹滕屠鄭沽皆爲入幕之賓嚴於已而寬於人所以爲大也禮云恥費輕實晏子有焉論語云躬自厚

而薄責於人希文有焉

佛教未行之先其早爲前驅者惟莊子而已佛教旣行之後其相爲表裏者惟莊子而已故曰小機者執之卽別大用者通之則同陋哉慙山之影響論也乃以三禪判老莊乎是猶本國之輿臺而傲鄰國之君王也多見其不知量矣

慙山名德清

常無欲以觀其妙常有欲以觀其竅此兩者同出而異名舉此三言而三乘十二部盡於此矣定而後能靜靜而後能安安而後能慮舉此三言而圓覺

之二十五輪楞嚴之二十五圓通盡於此矣謂孔
老淺而釋氏深劣僧之見也謂佛老邪而儒教正
劣儒之見也一言以折之曰聖人無常心以百姓
心爲心

慙山之判老莊於三禪東溟之判孔子於七地皆泥
教之言也然而慙山愚矣東溟有逆流如來一語
以寬地步其猶善爲說詞乎

考亭之四書集註精矣非考亭一人之能也蓋集唐
宋以來名儒之見而折衷之此其所以精也然亦

有必不可從者尊德性章之分存心致知求放心章之而後可以上達數語是也以廣大高明屬德性則問學獨可不廣大可不高明乎以精微中庸屬問學則德性獨無精微獨無中庸乎且不尊德性則問學不祇糟粕乎既尊德性則問學不添蛇足乎至於求放心註腳猶爲支離章中首言仁人心也求放心卽求仁也求仁之功亦不爲下學矣乃曰而後可以上達則其所上達者更有何事乎且而已矣者竭盡而無餘之詞也以而後可以四

字解而已矣三字其文理可通乎蓋因與陸子靜
作對立意相反惟恐一言之徑捷近於陸學故作
此迂曲之解以別之總起於一念之勝心而不自
知其說之大敗矣大凡主於必勝者必至於大敗
不獨道學爲然曾子以自反而縮自反而不縮一
語雙提真萬世之師也使有宋諸大儒而知此則
在朝可無洛蜀之黨在野可無鵝湖之辨矣伊川
考亭皆北宮黜之徒也

人生世間凡爲人賤惡之事不可有一焉然爲人所

愛敬之事亦不必其多也有一二焉足矣若事事求過人則精竭而氣傷且力分而業不精吾見其必窮矣吾友顧朗仲王季和皆中道而夭殆以是夫

孟子之書不脫文人習氣其尚論人物指畫地理多有未安只是齒牙間鬆快耳如舜生於諸馮遷於負夏卒於鳴條今雖不能灼定其何處大槩在青冀之域耳豈可謂之東夷乎曰排淮泗而注之江夫泗入淮可也而淮豈可入江淮之所以列四瀆

者以其獨至於海也若必須注江而後達海則亦
不得謂之瀆矣且江與淮相隔三百餘里人所共
知若堰淮入海之路而必注之瓜儀則高郵界首
諸湖之水盡化爲濁流而廣陵一郡之民盡化爲
魚鼈矣使孟子曾身歷其地有不自笑其失言乎
曰太公望散宜生則見而知之夫太公大將也散
宜生謀臣也何與於道統若正言之曰周公見而
知之豈不穩當正如作文字者好用新鮮字眼遂
不顧其心之所安耳

道家之書莫妙於莊子佛家之書莫妙於楞嚴莊子
多引而不發楞嚴則和盤託出矣有志於道者且
勿讀楞嚴只讀莊子深思而自得之可也

言道之文自六經思孟外董仲舒時有迂腐楊子雲
好雕琢王仲淹多模倣皆非真有道言也其出
之自然而心和氣平理明辭順者惟周茂叔之太
極圖說與通書爲然其真有道之言乎張橫渠有
意爲文而拙於文如西銘惡旨酒一聯疵病非一
以崇伯子稱神禹近於狎大人一失也孟子所稱

不顧養非止好飲一端今專以惡旨酒爲顧養二
失也惡旨酒是禹故事育英才與穎封人何與而
扯以爲對三失也如此作法卽入之律賦時文中
人且譏其不工而況於垂世立言乎二程極贊此
銘稱爲泰漢以來所未到又推其筆力過人然不
共爲譏彈潤色亦未盡朋友忠告之道也

余少時偶聽一表兄語有會於心至今不忘其人奕
與射俱在下下品而善論其理云學射日高一日
則垛子日大一日學碁日高一日則碁盤日小

日所謂墾子曰大者卽列子貫虱之說也所謂碁盤日小者蓋機勢融徹三百六十一路了了在目不至顧此失彼得後遺前所以謂之小耳得學射之法可以看書所謂認題是也得學弈之法可以作文所謂布勢是也

告子原是儒家者流非老莊之徒也其性猶杞柳及生之謂性等語實自體認精思得之孟子只把名教降伏他告子亦爲名教所壓不敢開口申辨其心未必服也如破杞柳之說則以戕賊人禍仁義

之說壓之正爲告子之貴仁義也若如老子失德
后仁失仁后義及莊子之攘棄仁義則且欣然肯
戕賊之說矣破生之謂性則以犬牛猶人之說壓
之正爲告子之貴人賤畜也若如莊子之天地與
我並生萬物與我爲一則且傲然受牛犬之名矣
故孟子能折告子之口不能服告子之心

橫渠之西銘其意甚莽其詞甚鹵以覆瓿可也正蒙
中頗有名言如聖人在上而下民咨氣一之動志
也鳳凰儀志一之動氣也賢才出國將昌子孫才

族將大聲者形氣相軋而成易爲君子謀不爲小人謀戲言出於思也戲動出於謀也此數語可誦禹貢三江之說我友何季穆言之甚詳予嘗勸其著論以明之季穆曰吾文不如子假子之筆宣吾之意可也予謙讓未遑無何而季穆死矣故予輓詩中有追辨三江渾似痴之句愧未能著書以終季穆之志今略述其概於此水經註引郭璞語云三江岷江淞江錢塘江也極直截痛快岷江者卽今之楊子江禹貢所謂北江也淞江者名賴陽江亦

名陵陽江亦名歷陽江今東壩所堰之水從大江
於蕪湖分出直注太湖而於淞江入海卽禹貢之
所謂中江也禹貢舉其上流而郭璞舉其下流耳
錢塘江人所共知禹貢雖不言南江然既有北江
中江則其有南江不待言矣非錢塘江而何卽以
禹貢解禹貢何其精確但漢旣合於江則總爲岷
江矣禹貢係北江於漢水之下係中江於導江之
下不知作何分別安得起神禹於九原而質之曰
然則蔡傳東江淞江婁江之說非乎曰何獨蔡傳

國語韋昭註已有此說矣水經註有亦謂之三江
一語最快今定其名曰小三江可也

偶讀歸震川集有三江說與季穆之言昭合乃知前
輩學問淹貫非吾輩所敢仰望吾輩所謂奇論者
在震川固以爲尋常茶飯耳

韓非子有田常鴟夷子皮得成其難一語楊用脩遂
著論以爲田常之篡范蠡實佐之及讀左傳知簡
公之弑在哀公十四年而越之滅吳乃在哀公二
十二年耳范蠡豈能於八年前先與田常之謀乎

每讀古人文字便令人謙讀今人文字便令人傲
水經註一書雖經楊用脩皇甫曾輩表章然差錯難
曉處甚多近世鬱儀王孫之箋出令人便於讀誦
其功不淺然有大誤二處尚未加辨正渭水中卷
旣云入於海矣而其下卷乃始序諸葛屯田渭濱
之事其爲倒迂顯然易知若以下卷作中卷中卷
作下卷豈非一快江水項下自江水左得起至安
陸之延頭止九十餘字明是註體而混入經文亦
應改正

佛經每言六道所謂天人脩羅餓鬼畜生地獄是也
要而言之只有天人鬼三界而已脩羅畜生地獄
則分插於其中者也上界以天人爲主卽有天脩
羅焉若帝釋之象天狗天鳥以及無足多足等蟲
則皆天畜也天牢貫索則皆天獄也中界以人爲
主卽有人脩羅焉馬牛以及百獸雞鶩以及百鳥
則皆人畜也刑部大理以及郡縣之監犯則皆人
獄也下界以人鬼爲主卽有鬼脩羅焉百獸百鳥
之類鬼道中亦皆有之則皆鬼畜也鄧都泰山之

類則皆鬼獄也三界皆以人爲主人亦貴矣哉請問人所以貴曰有二焉禮儀與文字是已有禮儀以相輯睦則億萬之衆可使聯如一身萬物所以莫敵其力也有文字以博古通今則億萬年之事可使了如目前萬物所以莫敵其智也若人而無禮儀人而不知文字與畜生何異哉佛經又有創生之地獄則似非鬼道所攝又當別論此蓋非凡耳目之所及也或笑曰然則天道鬼道子豈皆耳目及之乎曰目雖不及而耳所傳聞可以意推也

趙簡子神遊帝所帝使射翟犬此儒書所載以此
知有天畜也若二十八宿各屬一禽此則天人而
畜形者也貴人之牢賤人之牢天官書明言之以
此知有天獄也袁粲幼子所騎之犬非鬼犬乎康
王所騎之泥馬非鬼馬乎推之百獸百鳥莫不皆
然以此知有鬼畜也至於冥司拷鬼則家喻戶曉
又不待言以此知有鬼獄也嗚呼通天地人曰儒
若不究心於三界之事何以爲通儒乎

儒者之知有中界而不知有上界下界也自古之腐

儒皆然然而其膽尚怯亦曰不知爲不知云耳其
抗言掃之者則自張子二氣之良能一語始快哉
沈待詔之續原教論也曰謂天卽理可也而謂祭
天卽祭理可乎謂鬼神二氣之良能可也而謂祭
鬼神卽祭良能可乎張朱聞之必咋舌於地下矣
或問曰天神則天道矣人鬼則鬼道矣又有所謂
地祇者當屬何道曰此其詳在道經凡嶽瀆山川
之神皆陰官也當屬鬼道至於三十六洞天七十
二福地皆仙官所治當屬天道總未有出於三界

之說者也或又問曰楞嚴判仙於天之下而子合而一之何也曰楞嚴以降魔伏外爲宗旨故貶抑仙品耳以理論之則仙似高於天由福業而生天者如人世之恩蔭由脩煉而升天者如人世之科目總之歸於天道而已

李卓吾初識耿子庸問曰自以爲是不可以入堯舜之道又曰吾斯之未能信自信與自是有何差別子庸答曰自以爲是固不可以入堯舜之道不自以爲是亦不可以入堯舜之道卓吾大笑遂成至

友此一沒話頭極好如何不要自是又却要自是
曰此甚易明不出曾子自反而不縮自反而縮二
語耳自反而不縮雖舉世譽之無解於不是也若
自以爲是則不可以入堯舜之道也自反而縮雖
舉世非之無害於是也若不自以爲是則不可以
入堯舜之道也鄉愿病處只是不求慊於心而求
慊於世衆惡之則自以爲非衆悅之則自以爲是
如水母無目以蝦爲目故不可以入堯舜之道耳
曰然則察言而觀色慮以下人非乎曰此先以質

直好義爲主正是求慊於心所以觀察下人者誠
恐自己有不到處故借鑑於人必求無不慊而後
已耳比之鄉愿媚世真天地懸隔

聲色臭味安逸皆性也君子何以忍嗜慾也曰富貴
而不忍嗜慾則貽累於人貧賤而不忍嗜慾則貽
累於己以李德裕之相業而有水遞玉食之侈以
杜子美之文章而有殘盃冷炙之辱皆爲嗜慾所
役也能如公孫弘之脫粟布被則可以長處樂矣
能如陸龜蒙之杞菊賦則可以長處約矣

舌柔存齒剛壞故君子不爲齒而爲舌目無厭腹易足故聖人不爲目而爲腹

冢宰以九兩係邦國之民凡所謂師儒友吏之類皆人也而九曰藪以富得民則從來以藪澤解之其可通乎如曰藪澤則當入於九職任萬民之條與九兩係民何與愚謂藪者富家巨室之好施與者雖非官非吏非師非儒而能聯屬民心此亦邦國之所不可少者故周公明許之而著之於九兩之條也周禮以富得民謂之藪後漢黨錮傳以財救

人謂之厨此二字極相似但藪出於國制之所許故可以助治厨出於黨人之私號故反以致禍耳用民之力歲不過三日然則有大興作如城郭宮室之類累旬月而後就者將奈之何曰三日以內民自備工食者也三日以外官給其工食而已無他法也亦有竟歲安靜而無事於三日之役者則奈之何曰計其工食之費而輸役以歸官可也至於小荒則歲止用二日大荒則歲一日此又在弛舍之例併役錢亦不計矣

周禮馬質馬死則旬之內更旬之外以其物更其外
否說者以旬爲十日謂乘官馬者十日之內馬死
則必責其賠償色力務期同於原馬若死於十日
之外則僅責其物色相似而已若死於二十日之
外則不責其賠償也愚以爲此說非也古者采薇
遣戍往返二年其餘朝聘會同必動經數月若馬
死於二十日之外便不責其賠償則一經行役將
遂無隻蹄之反矣其何以爲國哉蓋旬者十歲之
稱謂馬之齒也十歲以內稱馬也故責其更十歲

以外長馬也故責其物更二十歲以外則馬老矣其死非乘者之罪故不責其更也曰子之說於理則安矣然以十歲解旬字亦有據乎曰旬之爲言徧也固未可定爲十歲之稱亦未可定爲十日之稱也卽周禮中用旬字亦有三說有徧十日而謂之旬者朝士之旬而舉之鄉士旬而職聽於朝遂士二旬縣士三旬郊二旬野三旬是也有徧一歲而謂之旬者均人之旬用三日焉小荒則旬用二日焉大荒則旬用一日焉是也有徧十歲而謂之

旬者則馬質所云是也若執十日之解非但不可通於馬質亦不可通於均人矣十日之中用民力三日雖桀紂之暴虐亦必無是事而謂周公爲之乎

凡事觀於其大則必不爭於其小矣觀聖賢之遭謗誣則爭榮辱之念可以息矣觀帝王之被侵凌則爭強弱之念可以息矣

穀食之必化而爲糞穢自然之理也然而投穀食於糞穢者雷霆擊之生人之必化而爲死人亦自然

之理也然而殺人者王法誅之何者任其自敗則
無過而折其方新則有罪也任其自敗則雖湯武
之弑君篡國人不以爲非折其方新則斷一樹殺
一獸亦足以干天地之和故君子貴知時

凡聽徵如負豕豕覺而駭凡聽羽如鳴馬在野凡聽
宮如牛鳴害中凡聽商如離羣羊凡聽角如雉登
木以鳴音疾以清此語出管子當表出之

魯頌居常與許管子小匡篇有反其侵地常潛蓋僖
公時常沒於齊許易於鄭

齊桓存三亡國以屬諸侯謂杞邢衛也封邢衛詳左傳城緣陵以封杞見管子大匡篇

左傳是四國者專足畏也上文但言大城陳蔡不蕪解者遂以四字爲三字之悞讀賈誼新書有大城陳蔡葉與不蕪等語始知四字實未嘗誤也左傳偶遺葉字耳世固有本書脫誤而他書可証者讀者不可不知先是楚靈王遷許於城父葉爲空邑徙方城外以實之因大城葉事見左傳昭公九年賈誼治安策可爲痛哭者一謂諸王也可爲流涕者

一謂匈奴也讀者見可爲流涕者也一語篇中凡再見遂誤以一字爲二字可爲長大息者六篇中止載五事蓋班固刪其一也其一太息言私鑄錢布事實誼新書見存宜採以補漢書注

檀弓填池二字鄭注讀爲奠徹穿鑿太甚愚謂池卽後池視重雷之池謂柳車之池填乃顛字之誤旣祖則樞轉向外矣欲受弔乃顛轉柳車還令樞北首乃推車而反於故處也舉池以表柳車也此說稍可通

反壤猶漢書言復土也衣周於身則身不得見矣棺周於衣則衣不得見矣椁周於棺則棺不得見矣土周於椁則椁不得見矣反壤而樹之則并其土亦不得見矣此正是深藏之意哉乃贊嘆之決辭非譏也

陽虎_曰於匡時孔子弟子顏刻爲御孔子過匡時亦顏刻爲御貌又相類故匡人以爲虎而圍之見禮記畏厭溺疏

叔梁紇七十而娶顏氏禱於尼山而生孔子生三歲

而紇卒則壽可七十四五也

檀弓爾以人之毋嘗巧則豈不得得字爲句言以人之毋嘗巧則於心無不安若康子以其毋嘗爾之巧則心必痛矣欲其設身處地也兩以字字法正相對

檀弓爲懿伯之忌不入左傳作遇懿伯之忌敬子不入遇字甚明鄭杜兩註皆如說夢集註載劉氏之說解忌爲忌日甚當但謂敬叔避懿伯之忌則未是懿伯於敬叔爲無服之叔祖豈有爲立忌日之

禮蓋懿伯是惠伯嫡叔惠伯應立忌日敬叔恐惠伯以忌日入滕爲不便故逡巡不入所以體惠伯之意及惠伯有不以私忌廢公事語故遂相將而入也玩左傳椒請先入敬子從之二語意義曉然矣

文中子年十六卽抗顏而爲人師非亞聖大賢其孰能之唐人如司空圖輩極口推尊而宋范文正公至以仲淹爲名希文爲字則文中子之品槩可推已獨其書多模倣論語而又謂房杜王魏皆其門

人則出於阮逸之附會非文中子意也予嘗讀王
無功遊北山賦泉凝洙泗下自註云吾兄通字仲
淹生於隋末守道不仕大業中隱居此溪續孔子
六經近百餘卷門人弟子相趨成市故溪號王孔
子之溪也姚仲由之正色薛莊周之言理下自註
云此溪門人常以百數惟河南董恒南陽程元中
山費瓊河東薛收太山姚義太原溫彥博京兆杜
淹等十餘人相爲後來題目以姚義慷慨方之仲
由薛收理識方之莊周並不言及玄齡等其答馮

子華處士書云又知房李諸賢實肆力廊廟吾家
魏學士亦申其矛由此推之則魏徵實嘗受業於
文中子但不在董常程元之列耳至於房杜王珪
則絕不相及特拈出以破吠聲者之疑

詩經王事靡盬註云不可以不堅固也夫以不堅固
訓盬字毛鄭以來皆然不可易矣但以不可以三
字訓靡字則其解頗曲而不暢愚謂靡盬二字各
自爲義漢書爲酒醪以靡穀注靡散也說文靡披
靡也從非麻聲徐曰披靡分也蓋謂王事如草之

披靡而不植如鹽之細碎而不堅固正使臣奔走
幹辦之時豈可言歸哉如此解方通

聖人覩轉蓬而作輪後人詩詞中言飄散者多以轉
蓬爲喻轉蓬者謂如蓬花之旋轉於空中也

文以氣爲主陸務觀之文不減於東坡而不如者氣
不如其高明也東坡之文不減於歐公而不如者
氣不如其溫厚也

陸宣公之四六非不可學也然而後世無與宣公匹
者四六之條暢自宣公昉也蘇長公之文字非不

可學也然而後世無與長公匹者文字之清空自
長公昉也

易經朋盍簪註云盍合也簪聚也旣云合又云聚不
已複乎愚謂簪字明明是冠上之笄何乃以虛字
釋之蓋簪是首之所戴者首聚則簪合矣盍簪猶
言聚首也

孟子云此亦妄人也已矣如此則於禽獸奚擇哉比
人於禽獸傲之極也范蠡云吾雖醜然而人面哉
吾猶禽獸也自比於禽獸其傲更甚矣要之此二

語皆偏辭也不可以爲訓

今之人失勢則曰吾其奈彼何得勢則曰彼其奈我何吁吾其奈彼何不失爲引分自安猶之可也彼其奈我何則不仁無禮無所不至矣若君子則不然失勢則曰匹夫不可奪志也得勢則曰彼亦人子也可善遇之故在上不陵在下不援

智者明義理識時勢善哉其言之也識時勢而不明義理則市井之智耳不明義理并不識時勢則婦人之智耳所以古人有舉朝皆婦人之嘆

從善必登從惡必崩乃自然之理聖人不能違天地
亦不能違也世之愚者多以富貴貧賤定人高下
智者則不然以賢智愚不肖定人高下自達人觀
之欺貧重富乃秉懿之結果而好善惡惡持勢利
之幾先兩者雖有早晚之殊其寔則一也善乎達
觀之偈曰天上人間勢利同總將福業判雌雄真
知言哉

立人之道曰仁義禮智信爲將之道曰智仁信勇嚴
勇卽義也嚴卽禮也必五德備而後可爲將將亦

難言哉乾卦元亨利貞配仁義禮信而不及智蓋
乾知大始以易知言乾而智在其中矣仁禮義信
皆智之川流也

靖郭君相齊懷左右刷而左右重不知刷爲何物或
作刷音刷韻會云禮有刷巾蓋刷是拂拭之義刷
巾拂拭之巾也韓非省文故不言刷巾而止言刷
耳升菴讀爲尉又轉爲禕以爲卽詩之結褵又因
孔疏中香纓而解爲香囊穿鑿甚矣又倭幸傳駿
驥冠是文雉之類而升菴誤以爲後猊後猊獅子

也以獅子皮爲冠有何嫵媚升菴雖博極羣書亦有輕於立論處

常棣之詩曰兄弟急難每有良朋况也永歎又曰旣安且寧雖有兄弟不如友生此蓋極言朋友之不如兄弟也伐木之詩曰相彼鳥矣猶求友聲矧伊人矣不求友生而卒章則曰兄弟無遠此蓋言朋友必不可少而兄弟亦不可疏也正以答前篇之意故編詩者序而次之解者卽以諸父諸舅兄弟爲友生誤之甚矣

中庸九經亦以尊賢居親親之上正與伐木篇同意
尊賢者所謂求其友聲也親親者所謂兄弟無遠
也要之賢者之取友也賴以彌縫其失匡救其災
不肖者之取友也至於遠間親新聞舊此常棣伐
木二篇所以並存而不廢也

貧人問求富之術於富人富人曰欲學吾術先去五
賊五賊者仁義禮智信是也此亦憤世之言耳若
五物盡去則必喪家亡身矣何能富哉故爲富不
仁爲仁不富誠可去也義則多廉潔多慷慨有礙

於富誠可去也禮則多辭讓多儀文有礙於富誠可去也惟智與信則不可去徵賤徵貴知取知予至於趨利避害偃炎附熱非智其何以知之凡富家必有任用之監奴凡巨賈必有行財之小商非信其何以御之故前三者實富之賊而後二者乃富之翼也求富者去其三賊存其二翼可也

詩經有上文叶韻而末句不叶者麟趾騶虞之類是也有下文叶韻而首二句不叶者瞻彼洛矣之類是也有首句自與第三句叶第二句自與第四句

叶者兔且魚麗之類是也有首句與末句叶而中二句不叶者決拾旣伙之章是也有用中州韻叶者左右芼之叶鍾鼓樂之烝然罩罩叶式燕以樂之類是也有通章不叶韻者如大雅其在於今一章及周頌維天之命昊天有成命時邁其邦等篇是也詳知其例方可以讀詩或曰全篇不叶韻何以爲詩曰佛經偈頌皆未嘗叶韻也曰西方之書豈可以律華言乎曰西海有聖人出焉此心此理同也苟可以長言之嗟歎之何必叶韻哉

烝也無戎戎字當是戌字之譌戌與侮叶韻且訓戎爲助亦牽強

小雅云莫肯念亂此語最爲有味凡承平之官吏多恣爲貪污豪富之子弟多恣爲驕奢皆莫肯念亂者也嘗讀容齋隨筆愛其二則其一可以警貪污之官吏其一可以警驕奢之子弟謹錄於左

陳勝初起兵諸郡縣苦秦吏暴爭殺其長吏以應勝晉安帝時孫恩亂東土所至醢諸縣令以食其妻子不肯食者輒支解之隋大業末羣盜蜂起得

隋官及士族子弟皆殺之黃巢陷京師其徒各出
大掠殺人滿街尤憎官吏得者皆殺之宣和中方
臘陷數州凡得官吏必斷臠支體探其肺肝或熬
以膏油叢鏑亂射備盡楚毒以償怨心杭卒陳通
爲逆每獲一命官亦卽支解之豈非貪殘之吏倚
勢虐民比屋抱恨思有所出久矣故乘時肆志人
自爲怒乎

容齋二筆

元魏破江陵盡以所俘士民爲奴無問貴賤蓋北
方夷俗皆然也自靖康之後陷於金虜者帝子王

孫官門仕族之家盡沒爲奴婢使供作務每人一月支稗子五斗令自舂爲米得一斗八升用爲餽糧歲支麻五把令緝爲衣此外更無一錢一帛之入男子不能緝者則終歲裸體或哀之則使執爨雖時負火得煖氣然纔出外取柴歸再坐火邊皮肉卽脫落不日輒死唯喜有手藝如醫人繡工之類尋常只團坐地上以敗席或蘆葦襯之遇客至開筵引能樂者使奏技酒闌客散各復其初依舊環坐刺繡任其生死視如草芥先公在英州爲攝

守蔡騫言之蔡書於甲戌日記後其子大器錄以相示此松漠紀聞所遺也

容齋三筆

人能念亂則必思所以全其身矣人能念死則必思所以全其心矣僧家示衆必曰生死事大無常迅速聞之能不悚然

避勞怨卸干係但知爲己不知爲國爲民此俗吏之恒態也然觀於貪縱之吏則俗吏皆良吏矣奸貨財私妻子但知有己不知有父母兄弟此俗子之恒態也然觀於蕩覆之子則俗子皆才子矣

孟子慕少艾漢詁讀少爲上聲訓艾爲刈固爲牽強
朱註以艾爲美好字書從無此解尤爲杜撰蓋古
人呼男色爲艾左傳旣定爾婁豬盍歸我艾豨國
語國君好內適子殆好艾大夫殆戰國策魏牟謂
趙王曰王不以予王而予幼艾此數艾字正可解
孟子少艾之義蓋凡人旣知好色而未有妻子未
免與變童徵逐以今證古此說無疑

楚辭少司命
憇長劍兮擁

艾幼

余以崇禎戊辰歲首筮得謙之升易林有十竅龍身

造化八元等語其年遂舉子於生肖屬龍則龍身之占驗矣但十竅之說他書無考或云九竅者胎生八竅者卵生龍卵生之屬也而以角聽八竅加兩角非十竅而何其說有理識之以俟知者

月令仲夏正種黍之時而云農乃登黍似於理未當蔡邕云今蟬鳴黍是也雖曲爲之解終於孟秋農乃登穀句有礙今以目驗之黍稷稻粱諸穀俱無於五月熟者惟小麥則五月熟黍字或來字之誤也

曾子問君出疆以三年之戒戒命也謂出戒於國云
我此行三年而後歸也古者諸侯從天子征伐有
三年不歸者易曰高宗伐鬼方三年克之於此之
時從征諸侯必三年不歸國也周公東征亦三年
詩云我徂東山滔滔不歸是也孔疏解三年之戒
爲三年喪備失之

賁桴土鼓正所謂擊壤也堯時雖有八音然山野間
古風尚存耳

禮運卜筮瞽侑侑卽瞽之以樂侑食者耳以下筮瞽

不可爲句故添一侑字以成文耳鄭註解爲四輔
非是巫史卜筮瞽皆賤官也與四輔並稱則爲不
倫

內則毋敢敵偶於冢婦註雖有勤勞不敢掉罄正義
云齊人謂相絞訐爲掉罄崔云北海人謂相激事
爲掉罄蓋如今人云相軋也推掉也

少儀不疑在躬在躬謂服飾也謂冠履衣裳之類在
身者皆有常制不敢有奇邪異衣使人致疑也又
一說下文衣服在躬而不知其名曰罔卽此句注

脚不知則疑也

不貳問謂一度問卜止問一事若問二事則心不專
卽爲不誠也若一事則容有二問如卜日有上旬
中旬下旬之異曲禮所謂卜筮不過三是也若魯
四卜郊則春秋譏之若代人卜筮亦不嫌有二嚴
君平賣卜日爲五卦訖則下簾

坊記故君子有君不謀仕唯卜之日稱二君有君正
與三月無君則弔相對有君則見爲人臣也見爲
人臣而謀仕是二心也惟卜之日稱二君謂未仕

之初或失位之後欲謀仕而問卜則可稱二君如
或齊或魯之類狐突云策名委贄二乃辟也與此
經文義正相足

春江一曲柳千條乃劉禹錫詞周德華喜唱之德華
所取柳枝詞有六此其一也升菴選唐絕定爲德
華詩誤矣事見唐人雲谿友議德華劉採春女採
春元微之所狎娼也

潔淨精微易教也又云易之失賊蓋太潔則滓穢無
所容太精則情僞無所遁必陷爲刻薄人矣申韓

原於道德亦是此意知其白守其黑則深於老亦深於易矣

禮記引詩經處甚多鄭注多與詩箋不同疏按鄭志答吳模云注記時孰就盧君後得毛傳乃改之

左傳云以害鳥帑於人則妻子爲帑於鳥則鳥尾爲帑

曲禮云禮不妄說人不辭費蓋禮之所無不妄費以媚說於人禮之所有不惜費而辭謝於人二句意正相對費字與表記耻費輕實左傳多取費焉費

字同義

几世之與而不取施而不報者皆謂之費如今人云
費財費力是也道之爲物自天地聖人以至夫婦
鳶魚無不斟酌焉無所不與而未見其有所取也
無所不施而未見有報之者也故曰君子之道費
鴛鴦于飛則畢之羅之此言動者危也鴛鴦在梁則
戢其左翼此言靜者安也乘馬在廐無驅馳之勞
而有芻秣之利言其安且得養也周自昭王南征
不復巡狩禮廢穆王聽祈招之詩而後獲沒於祗

宮蓋哀周之巡狩有危道焉是詩不知的於何王之世然玩味詩意蓋以戒王之無巡遊耳朱傳以鴛鴦乘馬興君子以畢羅摧林興福祿可發一笑檀弓所識其兄弟不同居者皆弔正對上文雖鄰不往而言有殯之時苟非兄弟雖鄰不往弔平居無殯之時則苟有一識者雖其不同居之兄弟亦必往弔之言吉凶相反也所識已疏矣所識之兄弟又疏矣所識不同居之兄弟又更疏矣然且必往占之弔禮其廣如此

檀弓季武子死曾點倚其門而歌按曾點之年無文可考但孔子生於襄二十二年襄三十一年薨至昭七年武子卒則是時孔子甫十七歲曾點必少於孔子度不過十餘歲耳遂敢臨武子之喪而歌真可謂穉且狂矣至於曾參誤斷瓜根而點幾殺之則狂暴之性老而不改也

檀弓申詳之哭言思也亦然註云申詳子張之子言思子游之子申詳妻之兄弟也由此言之則子張之子子游之婿也

張老慶文子成室而乃曰哭於斯似於不知忌諱矣
文子乃拜謝其言故記者兩美之

祭義天子七廟禮經有明文鄭康成堅執殷人五廟
之說蓋鄭未見古文尚書不知商書有七世之廟
可以觀德二語也鄭又以周文武兩世室在七廟
之內引周禮守祧八人爲證謂若兩世室在七廟
之外則守祧何止八人不知周公作周禮時文武
俱在親廟中何緣添設守祧乎使康成聞此說亦
必啞然自笑也且周公初制禮而卽有守祧八人

則七廟已具又是一證此王肅難鄭所未及故特著之愚意周有九廟七廟及兩世室也殷有十一廟祭法殷人祖契宗湯又太甲爲太宗太戊爲中宗武丁爲高宗併六親廟而爲十一也自武丁至紂雖多兄弟相繼然殷制兄弟分昭穆當紂時高宗已在七廟之外矣周自文武外雖以成康之守成宣王之中興而不得稱宗其嚴於祀典若此家語孔子對定公曰有功而不及祖有德而不及宗則於每歲之大嘗而報祭焉所以昭其功德也此

義亦不可不知

祭義天子有善讓德於天卽云易抱龜南面雖有明知之心必進斷其志焉坊記善則稱人過則稱己遂引詩爾卜爾筮履無咎言又引詩惟龜正之武王成之此二段叅觀之自明不煩註脚

易革卦君子豹變虎豹豺狼皆以攬殺援噬爲性者也然虎豹或以喻君子而豺狼專以比小人何哉有文與無文之別耳文之不可已如是夫

地官州長而下至於比長皆後世之所謂鄉官非任

職蒞事之官也每鄉必自有城邑有城邑則自有
邑宰專城而治者如所云鄉師之類乃任職蒞事
之官也若鄉老之每二鄉一人鄉大夫之每鄉一
人古者三公多係兼官惟六卿是實職使每卿主
一鄉正如齊語國有國子之鄉高有高子之鄉蒞
居常則爲一鄉之教主使其心志素相聯屬有事
卽爲一軍之命將號令自相服從耳至於州長而
下乃漢三老嗇夫之屬族師而下則如唐之坊正
村正耳大率以賓興之升于司徒不升于學者克

之王制所云升于司徒者不征于鄉周禮所云使民興能入使治之皆指此輩也其所云中大夫下大夫上中下士云者如漢賜民爵一級至公乘以上之類徒有冠帶而已非真居官而蒞事按爵而班祿也儒者不知其說遂有一鄉一萬二千五百家養官三千一百五十五員之疑是皆泥于文而不思其義耳

春官之世婦非天官之世婦也天官之世婦以御幸而春官之世婦以掌宮事鄭註以爲奄卿謬甚奄

人之見於周禮其爵不過奄上士而止安得有所謂奄卿哉且男子而冒世婦之名于文義亦不通愚謂必先朝之舊嬪或后夫人之保傅及退閒之宮人克之世婦之習本與大夫埒此獨云每宮卿二人蓋優異其爵秩使宮中之人尊敬而服其教訓也或以爲卿大夫之妻夫卿大夫妻各有家政安得入宮掌事且卿止六人耳每宮二人安得有十二妻或以爲卽用世婦中之習于禮者爲之則名爲卿大夫而仍叙御于王所亦覺名不正而言

不順皆非是

論語公山弗擾以費叛召子欲往此事不知的在何
年按左傳季寤公鉏極公山不狃皆不得志於季
氏叔孫輒無寵於叔孫氏叔仲志不得志於魯故
五人因陽虎陽虎欲去三桓冬十月順祀先公而
所焉此定公八年事也時孔子年五十未仕又左
傳仲由爲季氏宰將墮三都於是叔孫氏墮郈季
氏將墮費公山不狃叔孫輒帥費人以襲魯仲尼
命申句須樂頎下伐之費人北二子奔齊此定公

十二年孔子攝行相事時事也若叛在襲魯之年則公山弗狃方與孔子爲敵無緣反來相召且正孔子相魯仲由爲季氏宰柄用之時何乃起末之也已之嘆決無此理若叛在陽虎欲去三桓之時則此時但是密謀無顯然爲叛之跡論語不應直書以費叛也然以理論之還是八年時事蓋陽虎雖惡人而欲去三桓自是快舉於時弗擾輩與其謀廣招賢能以期集事而孔子亦遂欲因之以行其志耳然同一時事也陽虎諷之以仕則直拒之

弗擾招之以叛則欲從之聖意亦不可測葢陽虎惡人意在竊國柄而弗擾善人實欲張公室也觀哀八年吳伐魯時弗佗叔孫輒之言便可見其立心之忠順矣尚論者不可不知

張融云稷契年穉于堯堯不與帝嚳並在帝位稷契安得爲帝嚳子乎若使稷契必嚳子如大戴禮及史記則是堯之兄弟也堯有賢弟七十不用須舜舉之此不然明矣漢氏堯之子孫謂劉媪感赤龍而生高祖薄姬亦感而生文帝漢爲堯胤而用火

德大魏紹虞同符土行又孔子刪書求史記得黃
帝玄孫帝魁之書若五帝當身相傳何得有玄孫
帝魁融摭經典以爲五帝非黃帝子孫相續次也
一則稽之以湯武革命不改稷契之行二則驗之
以大魏與漢襲唐虞火土之法三則符之堯舜湯
武無同宗祖之言四則驗以帝魁繼黃帝之世是
五帝非黃帝之子孫也此因王肅難鄭禘郊之義
故融著論以申鄭意

記事者每好以雅詞文俗語最是文字之病卽如江

南有淫祀曰五郎神直謂之五郎有何不可而強
名之曰五通夫佛經有五通仙人蓋佛有六通一
曰天眼二曰天耳三曰神足四曰他心五曰宿命
六曰漏盡羅漢則具六通仙人未得漏盡故止云
五通也若夫五郎神者不過五行之邪氣依草附
木叨竊血食者耳奈何以五通名之且五通者一
人而具五通五郎者五人而共一祠于文義亦不
相類也

夔夔齋慄夔一足之物也凡人之立常時則兩足舒

布有所畏則兩足緊並有若一足之物故曰夔夔也史記今天下重足而立亦此意

三代而上禹之功最著故稱中華諸國謂之諸夏三代而下漢之功最著故至今稱中國人猶曰漢子緯書載六天之名字繆妄不經無愚智皆知之也而鄭康成尊信之繫辭爲聖人之作無愚智皆知之也而歐陽永叔獨疑之人之疑信亦何所不至哉資於敬君之心以敬父則可以爲孝矣資於愛子之心以愛弟則可以爲友矣

今世旣葬而復更其地者謂之遷葬非是按周禮媒氏禁遷葬謂生時非夫婦死而遷以相從者非更其地之謂更其地者當云改葬禮記改葬之服總
是也

周禮遂人五鄙爲縣五縣爲遂則一縣所治二千五百家也四井爲邑四邑爲丘四丘爲甸四甸爲縣則一邑所治僅三十二家也而一縣所治爲二千四十八家大小不同如此後遂以縣邑通稱論語千室之邑又有十室之邑左傳子皮欲使尹何爲

邑曰大官大邑身之所庇也又云韓賦七邑皆成
縣也則縣邑之通稱久矣又春秋時君大夫自稱
其國皆曰敝邑鄭語號鄩二國而云若得二邑商
頌商邑翼翼則國亦可稱邑逸周書作雒篇千里
百縣縣有四郡則縣方百里郡方五十里

歐陽公以繫辭非聖人作已爲可笑至謂子曰爲講
師傳說之言尤爲誣妄徧檢論語禮記大戴家語
等書未有非孔子之言而稱子曰者大學曾子門
人所作而述曾子之言必著曾字中庸第二章稱

仲尼曰以後則但稱子曰明子卽仲尼也論語於
有子曾子之言亦必稱其姓以別之蓋子曰二字
如帝曰王曰之不可僭也後世如孟子自稱孟子
曰莊子自稱莊子曰荀楊二子皆不敢自稱子曰
惟文中子直稱子曰則其沒後門人追尊之詞決
非仲淹本意也然而議者猶以吳楚僭王譏之豈
有易之講師而敢輒稱子曰者哉歐公之言所謂
遁辭知其所窮矣

史記飛廉之子惡來爲秦祖其弟爲趙祖子孫昌大
炳燭齋隨筆

如此助紂爲虐之人何以受天之祐蓋飛廉善走惡來有力父子皆以才力事紂原無大罪武周必誅之者以其心忠于紂而又才武足以倡亂故不得不除之耳飛廉死後必愬之於帝故帝命之代周正見天道之無私也有謂天帝醉而誤賜秦以天下者豈其然哉

今俗字謂一群人爲一宗字當從總或從驪陳風越以驪邁箋云驪總也男女合行俗又謂之一陶字當從禱左傳禱机註云言其凶頑無儔匹也

朱子之解經好排舊說至於字義亦不本爾雅說文而以臆決之如哂大笑也禮記云笑不至哂而以爲微笑不競不綌綌急也而以爲緩此等訓詁不知何從得之雖曰不妄吾不信也

綌急也見左傳注昭二十年

左傳引易士刳羊亦無盍也盍音荒今人呼蟹腹中肉爲蟹盍當用此字

孟子引而置之莊獄之間註云莊獄齊街里名疏亦別無一語按左傳襄二十八年得慶氏之木百車於莊昭十年又敗諸莊哀六年戰於莊卽此莊也

襄二十八年慶封反陳於嶽卽此嶽也蓋皆齊城內街里之名此是經典正文疏家全不引之今標出以見疏之疏略并見趙註之有據

子在回何敢死反而言之則子不在回何敢生此可見古人殉義之誠亦可見其立言之妙

惟誠也而後可以使詐則其誠也乃所以詐人之詐也惟廉也而後可以使貪則其廉也乃所以貪人之貪也若以詐使詐以貪使貪彼且不作使而作敵矣

今人罵人爲亡八非是當作王八五代史閩王建人呼爲賊王八是也

今人呼多鬚爲鬍子鬍直當作胡從髟俗字也五代史傳云胡鬚是也

左傳鵠鳩氏司事也疏云司事謂營造之事愚按營造之事當屬下文五雉爲五工正不得在五鳩之列按上祝鳩爲司徒鵠鳩爲司馬鵠鳩爲司空爽鳩爲司寇則此鵠鳩司事當是周官宗伯之職謂之司事者司祭祀賓客之事非營造之事也

楚語云少皞氏之衰也九黎亂德顓頊受之乃命木
正重司天云云曰少皞氏之衰則非少皞之本身
可知謂少皞卽傳顓頊其誣明矣

魏齊斗稱於古二而爲一周隋斗稱於古三而爲一
出左傳顏高之弓六鈞孔穎達疏

左傳哀四年蔡昭侯將如吳諸大夫恐其又遷也承
承字不可解杜注云承音懲蓋楚言愚謂此亦強
解古無此訓承之正訓奉也受也諸大夫恐其又
遷心不欲其如吳而口陽承奉受命也如此解稍

可通不然傳文或有脫字

易曰一陰一陽之謂道成之者性也則性成於道之後中庸言率性之謂道則性成於道之先蓋易之所謂道天道也卽中庸之所謂天命也故先道而後性中庸之所謂道人道也所謂五者天下之達道也故先性而後道苟不求其立言之旨而徒泥其文則有所戾而不合矣

左氏云儉德之共也共字當作去聲讀蓋言諸德共出於儉儉一失則諸德皆失矣今請得申其說假

如爲人上者而知儉則撙節愛養自不傷財害民
是儉有當於仁也爲人下者而知儉則制節謹度
自不納賄竊帑是儉有當於忠也就士庶論不儉
者必多方奔走以謀生儉則身常逸而心常閒豈
非善自爲謀是儉有當於智也不儉者或多方諂
媚以規利儉則閉門無求恥辱自遠是儉有當於
義也謹服先疇不致傾覆菽水可以盡歡是儉有
當於孝也有遺業可以處子孫且有遺法可以教
子孫是儉有當於慈也衣食所餘可推以濟親友

之急困者是儉有當於睦婣任恤也凡人生百行
未有不湏儉以成者謂曰德之共不亦信乎或曰
今之人非不欲儉也無奈舉世之人咸以慳吝爲
嗤鄙好勝者恥之不得不勉而從奢耳不知人生
之可恥而不知耻者多矣德行不如人則不耻才
藝不如人則不耻學問不如人則不耻至於一烹
庖之不善則耻之一裁製之不鮮則耻之一輿從
之不都則耻之豈非孟子所謂無耻之耻而無所
用耻者乎試觀奢侈之人才智者必至於敗名喪

節愚柔者必至於喪家亡身其可耻與慳吝之可耻孰甚善用耻者必能辨之矣

志欲大而心欲小致廣大而盡精微也知欲圓而行欲方極高明而道中庸也

孟子云五穀不熟不如萑稗蓋言爲小善而有成勝於爲大善而無成耳若爲惡則愈熟而其害愈甚不可言五穀不熟不如烏喙野葛也荀子則云小事之成不若大事之廢與孟子此語卻可參觀

穆天子傳叙事極簡惟載哀淑人事甚詳可見穆王

情之所鍾實在於此瑤池王母亦草草而別獨於
盛姬哀念不置以此知好德之不如好色也享國
百年僅得一人當意不旬月而失之能不悲乎佳
人難再得詎不信哉

抱朴子云周穆王南征一軍皆化君子爲猿爲鶴小
人爲沙爲蟲此千古奇事而本傳絕不及之何也
蓋昭王南征不復而民間遂譌言有一軍皆化之
說實無此事也有則左氏莊列必引及之矣

河伯呼穆王曰穆滿未死而先呼其謚蓋神人已先

知之莊子所謂靈公之爲靈也久矣又河伯直呼
天子之名其體甚倨豈五嶽視三公之說至此而
有不能通者耶夷王下堂而見諸侯人事鬼事其
盛衰之際亦略同

小兒出豆古醫書無之本草謂之時行豌豆瘡然亦
唐以後人語也不知此症昔無而今有耶抑古人
不識而後人識之耶偶讀文苑英華第七百七篇
有黃滔作陳先生集序云先生諱黯字希孺年十
三袖詩謁清源牧時豆新愈牧戲之曰藻才而花

此等佳義
小亦晚以
萬方之人
計一食
此爲飾
乎要者于

貌胡不咏歌先生應聲曰玳瑁應難比班犀定不
加天嫌未端正滿面與裝花豆字見文字中始此
友人牧齋子七歲讀論語至亞飯干適楚問師何以
有亞飯三飯而無初飯師不能對余適訪牧齋因
令之質余余答曰此句當與一餐告飽句相發明
天子一飯而告飽諸侯二飯而告飽大夫士三飯
而告飽告飽之後必須以樂勸侑然後復食當初
飯時本不須勸侑故無侑食之樂也此義在禮記
郊特牲中云凡食天子一諸侯二大夫三食力無

算此之以少爲貴者也至於魯之有亞飯亦自有
說魯本諸侯應再飯而後告飽不應亞飯卽用樂
因成王賜魯以天子之禮樂故有亞飯之官耳此
義亦不可不知此子乃欣然領解而入

朔方正訓曰北方唐堯都唐在今山西故堯典之朔
易在正北今之朔州等處是也周都豐鎬在今陝
西故小雅之朔方在西北今之寧夏河套等處也
蓋皆以國都之北爲朔

國語及周本紀俱謂自后稷至文王爲十五世孔氏

公劉疏云自虞至周有千三百歲必每世在位皆八十許年子必將老始生乃可克其數不近人情之甚以理而推實難據信此言甚明爽愚謂自公劉以後世數必無誤惟不啻失國而自竄於戎狄之間此時不過西戎一部落耳國無史官家無譜牒自後至鞠陶不知凡幾世矣其君長名字皆以僻陋在夷都不記憶至公劉遷邠而始復爲聲教之國始有文字相傳鞠陶既是公劉之父無容不記憶所以復見於史冊耳度不啻至鞠陶不下三

四百年公劉之遷當在夏末商初也謂不甞生鞠
陶者妄也

維天之命毛傳云孟仲子曰大哉天命之無極而美
周之禮也疏引孟子趙岐註孟仲子孟子之從昆
弟先與孟子共事子思後學於孟子著書論詩毛
氏取以爲說譜云子思論詩於穆不已仲子云於
穆不似毛傳雖取仲子之言而文無不似之義蓋
不從其讀也又魯頌閟宮篇疏孟仲子曰是爲襟
宮序錄徐整云子夏傳曾申申傳魏人李克克

傳魯人孟仲子仲子傳根牟子牟子傳趙人孫卿
子孫卿傳魯人毛文公

楞嚴經有人天本豎畜生本橫之說蓋豎則首上足
下各得其宜橫則上下無辨矣人畜之分全在於
此畜生中亦稍有異者犬馬頭高於身故能爲人
用猿猴人立便有靈異此又橫而近於豎者也至
於地獄倒生則又不止於橫矣嗟乎世之形豎而
心橫且倒者可不思乎

世稱義之蘭亭真蹟在僧辨才所唐太宗與魏徵謀

遣御史蕭翼給得之以武德四年歸於秦王府考
是年正太宗破王世克竇建德開天冊府之歲也
魏徵尚爲太子建成謀主何緣與太宗共語且秦
王雖橫安能勅遣御史哉此好事之言不中理者
古者后夫人必有女史彤管之屬史不記過其罪沒
之后妃群妾以禮御於君所女史書其日月授之
以環以進退之生子月辰以金環進之當御者以
銀環進之著於左手旣御著於右手

廷邦能命龜田能施命作器能銘使能造命升高能

賦師旅能誓山川能說喪紀能誅祭祀能語君子
能此九者可謂有德音可以爲大夫矣山彤管鄭
箋卜云其吉箋

凡染絲一入爲練二入爲頰三入爲纁朱其四入與
五入爲緇玄其六入與七入爲緇

田者大芟草以爲防或舍其中褐纏旃以爲門裘纏
質以爲櫜閑間容握驅而入擊則不得入左者之

左右者之右戰不出頃田不出防出車攻毛傳

周弁殷冔夏收皆弁也委貌周玄冠章甫殷冔追夏

皆冠也

緇布冠太古冠布齋則緇之無筭缺

頰

項青組屬於

頰緇纒頰圓髮際結項中隅爲四綴以固冠也項中有緇亦由固頰爲之也今未冠著卷幘頰象之所生

爵弁助祭於君之服皮弁與君視朝之服玄端暮夕於君之服

文王受命六年始得太公又三年而崩則文王之興非太公之力也故詩惟有周南召南而不及太公

惟大雅惟師尚父時維鷹揚歸功於太公可見伐
崇伐密時尚未得太公也

文王十五而生武王至九十七而崩則武王八十三
矣武王九十三而崩則武王在位僅十年立四年
滅紂滅紂後又六年

周太姜太任太姒皆稱太此子孫追稱之詞惟邑姜
不稱太蓋避太姜也

邑姜太公之女成王之母太公遇文王至武王崩其
間僅十四年武王崩時成王已十歲則太公一遇

文王卽以其女爲太子妃可見聖主與聖臣相契
立談之頃卽約爲婚姻豈非盛事

武王八十四而生成王唐叔虞又其弟也應韓又叔
虞之弟也唯邦當是成王之庶長兄

鄭康成以九命之外別加九錫出禮緯含文嘉一曰
車馬云云宋均注云進退有節行步有度賜之車
馬以代其步言成文章行成法則賜之衣服以表
其德動作有禮賜之納陛以安其體長於教訓內
懷至仁賜之樂則以化其民居處修理房內不潔

賜之朱戶以明其別勇猛勁疾執義堅強賜之虎
賁以備非常亢揚威武志在宿衛賜之斧鉞使得
專殺內懷仁德執義不傾賜之弓矢使得專征孝
慈父母賜以秬鬯以祀先祖此後世九錫文之祖
左傳富辰云管蔡邠霍魯衛毛聃此八人并伯邑考
武王爲太姒十男也下云郇雍曹滕畢原豐郇此
八人當是庶出者書經命畢公保釐東郊蓋文王
之庶子也其年無可考外傳晉語云重之以周召
畢榮序於周召之下則年應少於周公

晉語詢於八虞賈逵云八虞周八士皆爲虞官或云八士皆南宮氏晉語八虞之下別云謀於南宮則八虞非八士

案史記年表衛莊公之立在春秋前二十五年蓋平王二十四年也衛武公幽王八年相周作抑戒詩年九十五又三年而幽王有驪山之禍又二十四年而武公卒時年一百二十二歲

大雅築城伊洹作豐伊匹則文王遷豐其城方十里四面共四十里也傳箋皆以爲大於諸侯小於天

予則天子之城方十二里四面共四十八里也周禮考工記匠人營國方九里蓋言封建上公之制耳典命云上公九命國家宮室皆以九爲節此數條可互證

鄭都城過百雉五丈爲版五版爲堵五堵爲雉是一雉有一百二十五丈也百雉當爲萬二千五百丈以六尺爲步計之三百步爲一里里長一百八十八丈萬二千五百丈當爲六十九里三分里之二也是其制反大於天子之城無是理矣故鄭杜諸家

皆以五版爲堵版濶二尺積五板之高而成一堵不在橫算之數所謂度長以長度高以高如此算則百雉當爲二千五百丈以法計之當爲十三里九分里之八也鄭伯國七命其城當方七里爲節則四面二十八里百雉幾居其半矣已踰大都三一之制故祭仲非之鄭以都城無如此大者故有三丈爲版之說則一雉長十五丈百雉爲千五百丈當爲八里三分里之一此說似爲得中又有雉長三丈之說則百雉止三百丈僅一里三分里之

二如此狹小何以爲都城此說亦恐非是

閤人外門用墨內門用奄囿游用刑

米之率糲卜稗九鑿八侍御七

皇甫謐云殷有三亳二在梁國一在河洛之間南亳
在穀熟卽湯都也北亳在蒙卽景亳是湯所受命
也西亳在偃師卽盤庚所遷書序將治亳殷是也
立政之篇曰三亳阪尹出商頌玄鳥註

楊子取爲我蓋惟務自利而不欲利天下也然知爲
我之爲利則亦自知之可矣又何必以之教天下

耶教之者欲以利之也是楊子終未能忘利天下之心也與爲我之說無乃自相矛盾乎如楊子者亦未能克其操者也

世傳蘇味道模稜之說蓋古人處衰世是非從違不敢太分明所以避謗遠害耳今之所謂模稜者則不然遇利則急取之未嘗遠害也遇勢則亟趨之未嘗避謗也而至於是非從違之際則務於模稜焉蓋不過便於異日之翻悔匿賴云耳故曰古之模稜也慎今之模稜也滑

今世有天主教者自大西洋來窟穴於廣東香山嶼而蔓延於兩京其人類碧眼不畜妻妾多奇器巧伎其教奉天主而不奉佛其黨類饒於貲能豢畜儒生之窮餓者而使之造作文字語言以緣飾其教要之文義皆鄙淺離遁不足道而士大夫之無識者亦或信之或問此教何所昉予應之曰此卽古之所謂祆祠也說文已有其字字從天不從天與祆字別自漢已有之而唐官名有祆正蓋其來久矣宋姚寬西溪叢語言之甚詳謹錄其說如左

余兄伯聲嘗考火祆字其畫從天胡神也音鹽堅切教法佛經所謂摩醯首羅也本起大波斯國號蘇魯支有弟子名玄真習師之法居波斯國大總長如火山後行化於中國宋次道東京記寧遠坊有祆廟註云四夷朝貢圖云康國有神名祆畢國有火祆祠疑因是建廟或傳晉戎亂華時立此至唐貞觀五年有傳法穆護何祿將祆教詣闕奏聞勅令長安崇化坊立祆寺號大秦寺又名波斯寺至天寶四年七月勅波斯經教出自大秦傳習而

來久行中國爰初建寺因以爲名將以示人必循
其本其兩京波斯寺宜改大秦天下諸州郡有者
準此武宗毀浮圖籍僧爲民會昌五年勅大秦穆
護火祆等六十餘人並放還俗然而根株未盡宋
公言祆立廟出於胡俗而未必究其卽波斯教法
也又嘗見官品令有祆正祆法初來以鴻臚寺爲
禮遠令邸後世因用以僧尼隸焉設官來歷如此
祆之有正想自唐室始段成式酉陽雜俎孝億國
界三千餘里舉俗事祆不識佛法有祆祠三千餘

所又銅馬俱在德建國烏澣河中灘流中有火祆
祠相傳祆神本自波斯國乘神通來因立祆祠祠
內無像於大屋下置小廬舍向西人向東禮神有
一銅馬國人言自天而下屈前足在室中後足入
土自古數有穿視竟不及其蹄西夷以五月爲歲
每歲自烏澣沂中有馬出其色如金與此銅馬嘶
鳴相應俄復入水近有大食不信入祆祠將壞之
忽有火燒其兵遂不敢毀則祆教流行外域延入
中國蔓衍如此康國蓋在西朝貢圖之言與此合

也 余按此條記祆祠甚詳但中引左傳用鄩子
于次睢之社註云睢受汴東經陳留梁譙彭城入
泗水此水次有祆神皆祖祠之寬卽續而云此卽
火祆之神則大謬予所不取蓋因寬不辨祆字與
祆字之異按說文祆胡神也從示天聲祆地反物
爲妖也從示天聲字省作祆杜預所云祆神蓋卽
所謂地反物爲妖者耳奈何誤讀爲祆而遂以爲
火祆之祠乎西域之通中國在漢武後當春秋時
豈有祆祠預入中國之理寬亦弗思之甚也韻會

云祆胡神也又官名一曰胡謂神爲祆關中謂天爲祆非今之天主教而何摩醯首羅者佛經所云曰禪天主蓋大千世界之主也

論語久要不忘要字當讀作去聲古人要字與約字通用約字亦讀作去聲今中州韻皆然

木蘭乃桂之屬史記優旃傳薦以木蘭如今烹飪之用桂皮也

史記高帝本紀五年高祖與項羽決勝垓下淮陰侯將三十萬自當之孔將軍居左費將軍居右皇帝

在後絳侯柴將軍在皇帝後淮陰先合不利卻孔將軍費將軍縱楚兵不利淮陰侯復乘之大敗垓下觀此則項羽之敗全是淮陰侯力而淮陰用兵全副伎倆亦於此戰見之也班固略而不書蓋以淮陰罪誅有意抹殺其功尚爲有說司馬光通鑑亦絕不道及一字何也蓋古人讀書亦未必能精細舉此一端可例其餘

高帝論功定封曹參功最多蕭何次之高祖不悅鄂千秋推明之以何爲第一帝乃大喜蓋曹參之功

所以致多如是者以其與淮陰侯信俱信擒後遂
沒其功而歸之參耳所以叙爲第一名雖參第一
寔見信第一也高帝旣擒信心益忌信不樂乎有
是說而事理較然又無一說可以易之者自鄂千
秋一時萬世之說申而韓信之功始抑高帝之心
始快矣故鄂君之言謂之進賢可也謂之蔽賢亦
可也高帝之喜謂之賞功可也謂之忌功亦可也
左傳且曰獻狀謂令曹人自供其觀駢脅之狀也國
語淫於觀狀淫大也過也謂鄭無禮於晉君其罪

大過於觀狀也

左傳距躍三百曲踊三百百字卽阡陌之陌謂田畔也直跳過三條田畔橫跳過三條田畔以示其不病也

玄王勤商十四世而至於湯又三十一王而後至於紂乃后稷勤周十五王而遂至於文文與紂同時也何殷之王皆短折而周之君皆長世耶非也蓋后稷之子孫世爲后稷至不啻而始失其官則自后稷以至不啻不知凡幾世矣而所記憶者止有

開國之后稷與失官之不畀而已周人亦據其所
記憶者而歷數之以定其昭穆非世數止於此千
年之間至少亦必三十餘世

家徒四壁立貧之極也然猶有四壁也至室如懸磬
則止有梁柱如磬之懸蓋并其四壁而無之矣

左傳云自幕至於瞽瞍無違命舜重之以明德國語
云幕能帥顓頊者也故有虞氏報焉註者皆以幕
爲舜之後虞思也愚竊有未安卽以內外傳之文
義推之自幕至瞽瞍無違命言舜之先世皆有德

而舜又重之以明德也安得先言後世而後及先
世乎卽先言後而追及於先則追及於舜可矣又
何越舜而追言瞽瞍乎若幕果爲舜之後則當云
幕能帥舜者也亦如下文杼能帥禹之例安得云
能帥顓頊乎以理論之幕必是顓頊之子孫舜之
遠祖但其世數不可考耳鄭語亦以虞幕與商契
周棄並稱而云其後皆爲王公侯伯則幕爲有虞
之祖無疑報者有功而不及祖有德而不及宗而
又不可同於無功德之祧墀故別爲祭以報之此

義詳見家語有虞氏祖顓頊矣宗舜矣故幕不祖
不宗而爲報耳

編管曰簫聚其管而統之於匏曰笙簫以象鳳之飛
笙以象鳳之集也然儀禮云笙入間歌魚麗笙歌
南有嘉魚笙歌南山有臺笙國語叔孫豹云伶簫
咏歌及鹿鳴之三或用笙或用簫未知其制如何
分別嗚呼儀禮三百篇今所存止十七篇耳雖云
可推測而知然亦僅可知其什一耳

晉語云羊舌肸習於春秋楚語云教之春秋而爲之

聳善而抑惡焉蓋周制各國之史皆以春秋爲名
非特魯史爲然也但各國多別自立名如晉乘楚
檮杌之類而魯則守周之舊名耳墨子明鬼篇曰
著在宋之春秋著在燕之春秋著在齊之春秋可
見春秋非獨魯史之名也

楚語啓有五觀註以爲太康昆弟也竊謂啓之不肖
子惟太康耳厥弟五人僉於洛汭述大禹之戒以
作歌皆賢人也安得列於姦子之數耶註謂觀爲
洛汭之地豈五子皆卽畢命於此後人哀之而總

稱曰五觀耶然則謂啓有五觀者謂太康不肖而致有五觀之禍耳非指五觀爲姦子也晉語稱卻有車轅趙有孟姬欒有叔祁范有函冶或指人或指事或指地蓋外傳句法多如是讀者當以義求之

齊語使海於有蔽渠弭於有渚環山於有牢此三句本難解而渠弭二字尤僻註云渠弭禪海也益不可解今細思而曲通之海謂大水也北人通稱大水曰海至今猶然海於有蔽謂軍行次於大水邊

令本國預設藩舍以爲遮蔽也裨猶言小也裨海者小水也渠卽溝渠之渠弭止也軍行至於溝渠邊不能徑度則必暫止故謂之渠弭旣暫止則令本國預爲除地以爲可止之處也環山而行所歷多荒僻無人之地或致匱乏則令本國預備牛羊豕以犒師也蓋魯衛燕旣得侵地雖有此費亦所甘心而齊之反三國侵地非曰直舉而與之也亦有所用之耳此管子之謀也未知然否

天問云陰陽三合何本何化穀梁云獨陽不生獨陰

不生獨天不生易云以一而神以兩而化佛經謂
父精母血與前世之識神而生人數說皆一理也
宦官盛於漢而有天下者卽宦官曹騃之孫操也盜
賊盛於唐而有天下者卽降盜朱溫也其兆皆先
見矣

但聞多食之致病矣不聞節食之傷生也但聞貪饕
之損福矣不聞淡泊之生災也

要窮學燒丹要死學採戰李赤肚名言也

楚子重之爲政也曰大戶已責趙尹鐸之治晉陽也

曰損其戶數蓋古者盛世之編戶非戶戶而編之也必閱其有丁有力能克賦役者而後著之於籍其或老或幼或疾或女戶皆漏而不書賦役不及焉所以政不苛而民不怨也卽如唐開寶全盛之時戶不登千萬若以實論之卽浙東西兩道之地其戶豈止千萬哉蓋下戶之不登於版籍者多矣王成僞增戶口亦只是搜括遺漏填之於冊非以無爲有也諸葛亮謂劉備曰荊州非少人也而著籍者少可語鎮南令遊戶皆自實嗚呼刻則浚民

寬則惠奸其必慈惠而明察者庶可以定戶口之數乎大戶謂寬大其戶蓋力不能獨克則爲之幫貼以廣之也

祁奚與叔向晉之兩大賢也所謂當十世宥之者也卽祁奚子盈之討祁勝鄔臧亦激於一朝之忿原非大惡乃荀躒受賂而言之晉侯晉侯遂殺祁盈而滅其族可謂淫刑以逞矣至於叔向之子食我不過以黨於祁盈亦殺之而滅其族是何言與是時韓宣子將死矣不能有所諫正真可恨也未幾

韓宣子卒而魏獻子爲政雖云成事不說然祁氏羊舌之田邑故在也自當訪其親支立以爲後以奉兩大賢之祀乃遂取其十一邑而分之此豈復有人心者哉乃成鱗從而諛之曰主之此舉也近文德矣是以盜賊之善於分贓而稱爲堯舜之揖讓也左氏又稱仲尼聞魏子之舉以爲義又聞其命賈辛也以爲忠使仲尼而果顛倒是非若此又惡足以爲仲尼哉嗚呼子產卒而仲尼聞之出涕使聞祁奚叔向之族滅吾不知其涕泗之滂沱當

何如者而乃忍於稱道贊嘆之哉

無驪姬之讒則晉國不亂而重耳無由得國無夏姬之妖則巫臣不奔而吳不通於上國故晉之伯也驪姬之力也吳之伯也夏姬之力也天生尤物必有關世道非偶焉而已也

左傳載宋景公夫人卒季康子使冉有往弔此事似不足載看杜註始知以終悼子求婚之事也蓋丘明一字一句必無虛設

欽王朗二人本末略同皆漢之敗將也皆吳之降

虜也皆魏之名臣也而世說獨優欣而劣朗且云王之學華俱是形骸之外去之所以更遠愚尋簡事跡竊以斯言爲未公也朗雖兵敗身擒然初猶保城逆戰旣敗於會稽猶能泛海入閩窮迫始降而歆舉郡迎寇幅巾入座恬不知耻其不如一也朗雖附魏背漢然隨衆稽顙無他逆節而歆至勒兵漢宮破壁壞垣牽出伏后犯天下之不韙受罵千載其不如二也朗於文明二朝屢進讜言奏議曄然可觀子肅傳家學爲世儒宗而歆遺言瘦如

三不如也大抵晉魏評論皆崇尚虛浮不核事實
舉此一端可例其餘

嵇叔夜臨刑時作詩曰欲寡其過謗議沸騰性不傷
物頗致怨憎不知欲寡其過則專務內省而不務
外飾此乃謗議之所以易叢也性不傷物則必愛
護人愛護者在此則觸忤者必在彼矣此乃怨憎
之所以易致也陽明聞謗謂門人曰我近來學問
大進覺鄉愿氣息少此言更有至理

陳壽魏書於王粲等文士傳俱刊落詞藻罕所紀載

較遷固之體似加嚴矣而吳書周魴詐降魏書七
篇胡綜偽造胡質降書三篇則詳載無遺是亦不
可以已乎於魏則削其所當存於吳則存其所當
削此皆史氏之大疵也從無論及者故特著之
凡物之凸起者謂之牡謂之陽凹陷者謂之牝謂之
陰此一定不易之詞也蓋大至山谷小至器用皆
然惟今之言印章者則以凹陷者爲陽文凸起者
爲陰文蓋古來之傳說固然求其說而不得則曰
以其虛也故稱陽以其實也故稱陰不知此瞽說

也凡後人之印章以印紙故凸起處其印文亦凸
凹陷處其印文亦凹古人之印章以印泥故凸起
處其文反凹而凹陷處其印文反凸所謂陽文正
謂印之泥而其文凸也所謂陰文正謂印之泥而
其文凹也蓋從其所印言之非從其所刻言之也
不察古今之異而妄爲影似之解其疑誤後學深
矣

凡古人書牘俱用竹簡或用木札旣書則泥封之而
加印於其上以爲識周禮之所謂璽節左傳之所

謂璽書其制大率可想也秦漢封禪則書以玉冊
封以紫泥印以玉璽至於上書言事則書或用絹
素盛以綻襲其用印想或用於絹素之上當更詳
之

孟子曰墨氏兼愛是無父也且天之生物也使之一
本而夷子二本故也由此言之則天下之大不孝
莫如兼愛矣墨子則曰無言而不讐無德而不報
故愛利人之親者人亦報以愛利吾親惡賊人之
親者人亦報以惡賊吾親然則孝子之爲親計者

必先從事於愛利人之親矣由此言之則天下之大孝莫如兼愛矣此二說者誰是誰非曰墨氏之言天下之定理孟子之言儒者之深文

墨子之非命蓋恐暴主之恃命以虐民情民之委命而廢業其意是也然而其義非也夫命之有也必矣國祚之短長家道之興替人之貴賤貧富壽夭豈可謂無命哉卽墨子亦稱夏鑄九鼎卜由曰九鼎旣成遷於三國夏后失之殷人受之殷人失之周人受之由此言之則鼎之遷亦有數也而何疑

於國之存亡人之死生乎卽墨子之言以圖墨子此亦所謂矛盾之說矣

陸德明論語音之失云北人則而如靡異今經傳中多有之孟子而居堯之宮而當作如小雅綢直如髮如當爲而算法一一如一一二如二如亦當作而與無極而太極而字同義內典稱佛爲如來如者如如不動之義亦當讀作而

按韓非子博者貴梟勝必殺梟是殺所貴也觀此則知博之有梟如今象棋之有將將死則棋敗也

戰國策唐雎見春申君曰夫梟棋之所以爲能者以散棋佐之也註云梟博頭有刻爲梟形者散謂衆碁也觀此則博之六碁五散而一梟如今象碁之止有一將也又孫臣謂魏王曰王不見博者之用梟耶欲握則握欲食則食觀此則知梟碁可握可食而散碁則專主於食不得後握如今之象碁車馬砲可進可退而卒則有進無退也據此數條則梟之爲碁名無疑矣又按楚辭招魂云成梟而卒呼五白些註半倍勝也觀此則梟爲勝采而五白

則倍勝也杜詩袒跣大叫呼五白宛轉不肯成梟
盧本此韓詩梟盧叱迴旋則用劉裕與劉毅事註
引李翱五木經謂梟當作橡據此數條則梟之爲
采名又無疑矣豈基之刻梟形者名梟而采名自
名橡遂致相混耶至本朝楊用修乃以梟爲今之
么於前兩說皆無所稽則鹵莽穿鑿甚矣不知今
之所謂么卽古博齒之所謂塞皆刻爲一畫者列
于註及後漢書註甚明何乃昧目而道黑白耶摺
艾曰梟邀也六
博得邀者勝

荀子六貳之博則天府已註引六博爲解恐非是六博者多致貧豈天府之謂哉愚謂博市易也六二之博猶言三倍之利市也本以二而利以六故曰六二之博如此轉轉得利則成不竭之府已

韓非子管仲曰鑒乃自獘以爲治註獘虧勢也易大畜卦獘豕之牙獘豕蓋割勢

考工記玉人案十有二寸先鄭云案玉案也後鄭云玉飾案也而不言案之形制說文云案几屬亦不者其狀余少讀一書云案卽今之枰也此語似確

而竟忘其出於何書蓋案列於几之上故曰几案而案非几也今世有案卓亦置案於卓之上而案非卓也以案盛食則謂之食案今之托盤是也以案盛筆硯則謂之書案今之都盛是也舊本畫孟光舉案齊眉亦作手捧托盤狀則案之爲盤明矣註云其高十有二寸則大率與簋簋邊豆高下相等古人設席於地故食器皆高也然經不言長廣若干而但言尺有二寸豈長廣與高同爲一尺二寸而其體正方歟

或問東方朔傳中簍數註云戴器也不知戴器爲何物愚謂戴卽班白者不負戴之戴曰戴器則必上可以盛物而下可冒於首者又必以草及樹枝爲之故與寄生相類其狀可想見也今川貴間苗蠻尚多以首任物者然直戴之而已亦不見別有戴器也

周禮司燿季春出火民咸從之季秋內火民亦如之鄭註不言如何爲出火如何爲納火愚按烹飪之事不可一日廢無春夏秋冬夏之異也烘燎之事則

惟冬及春初用之焚柴之事亦惟冬及春初有之
不應季春反出而季秋反納也所謂出內火者蓋
專指陶冶鼓鑄而言禮器云然後修火之利范金
合土蓋火之爲用雖多而范金合土立成器以爲
天下利則其最大最巧者也故聖王以其作止爲
火之出內以節宣火性焉左傳云火見鄭其火乎
火未出而作火以鑄刑器火如象之不火何爲與
此義可相證

小宰貳冢宰凡六典八法八則九賦九貢九式皆掌

其貳而八柄八統不與焉蓋此二者乃天子之事
惟宰相得詔之而已小宰不得與也

周禮養老之典有三羅氏獻鳩以養之者國老也司
徒以保息養老者庶老也司門以財養之者死事
之老也賈公彥云國老卿大夫致仕者庶老士之
致仕者而皇氏以爲三者之外又有引戶校年庶
人之老共爲四種夫曰庶老則士庶老之老皆舉
之矣安得定爲士之致仕者而此外又安得別出
庶人之老耶公彥之疏固鑿皇氏之說亦贅

過人四邊醢人四豆大抵每用皆八內有菱芡棗脯以四物爲八邊者然其數亦八也惟饋食之邊但言棗栗桃乾榛榛實五物而其三則無文殊不可解鄭註謂桃是乾桃乾榛是乾梅而內則別有桃諸梅諸則是其濕者通前五爲七邊矣尚缺其一孔疏謂桃梅既有乾濕則棗亦有乾濕加此項爲八物也雖穿鑿之甚亦可推見先儒解經之苦心晉文請隧國語韋昭註以六遂之遂解之謂天子六鄉六遂諸侯有鄉無遂故曰王章也然觀費誓魯

人三郊三遂之語則諸侯之有遂明矣此解爲失
還當從杜預隧地而葬之說爲是

惟天下至誠爲能經綸天下之大經易曰雲雷屯君
子以經綸經綸二字原是開創之義詩曰經始靈
臺經之營之字義畧同

大宗伯以天產作陰德以中禮防之以地產作陽德
以和樂防之先鄭以天產爲男女之性地產爲分
地利後鄭以天產爲動物六牲之屬地產爲植物
九穀之屬然於禮樂分帖處兩說皆說不通愚謂

此四句正與樂記樂由天作禮由地制樂勝則流
禮勝則離等語相發明所謂天產卽指樂而言謂
樂由天作也作者鼓舞之意樂之用虛其所以鼓
舞人者微妙而難知故曰作陰德然又恐樂勝而
流也故以中禮防之所謂地產者卽指禮而言謂
禮由地制也禮之用實其所以鼓舞人者顯白而
易見故曰作陽德然又恐禮勝而離也故以和樂
防之禮樂交相爲制交相爲用而聖人之所以教
天下者至矣

大司徒五嶽鄭以中嶽爲嵩高西嶽爲華山此自虞至秦漢之所同也但在周則必不然職方以華山爲豫州之鎮則中嶽非嵩高可知以吳山爲雍周之鎮則西嶽非華山可知當云中嶽華山西嶽吳山

鄭康成說上公九獻以爲二裸朝踐二獻饋食二獻醕尸二獻并賓客之獻而爲九陳氏禮書據行人上公再裸而酢又云上公九獻以爲二裸在九獻之外然亦不能於朝踐饋食醕尸之外別舉三獻

以足九獻之數或云賓之初筵第二章云子孫其
湛各奏爾能又曰賓載手仇又曰室人入又然則
子孫也賓也室人也各一獻爲三獻并朝踐二獻
饋食二獻酺尸二獻則共爲九獻矣此說近是未
敢明其必然也

周禮籥人掌三易以辨九簠之名一曰巫更二曰巫
比三曰巫目四曰巫比五曰巫环以辨吉凶註謂更謂筮遷都邑
也威謂筮衆心歡否也云云似未得經意愚謂巫
威卽書與楚辭所稱巫咸自巫更而下九者皆古

神巫所著書各自名家如漢焦氏易林之類筮人
徧參之以辨吉凶也

塚人凡有功者居前鄭注謂居王墓之前處昭穆之
中央以理論之恐無臣葬正當居墓前之理竊謂
居前者雖依昭穆之次而其位稍向前以表異之
也居昭者以向右爲前居穆者以向左爲前

周禮六夢三曰思夢註覺時所思念之而夢四曰寤
夢註覺時道之而夢如註意則思夢寤夢有何分
別愚謂寤夢謂將寤時之夢蓋人寐將寤聲已接

於耳而色未交於目自有一種似夢非夢光景此則經所云寤夢也

政與教不同教之道在矯枉以就正柔者教之以剛剛者教之以柔所謂沉潛剛克高明柔克也政之道在因物以付物剛者治之以剛柔者治之以柔所謂強弗友剛克熒友柔克也

秋官掌客王令諸侯而饗禮則具十有二牢諸侯長十有再獻饗諸侯而用十二獻於禮不合蓋禮物雖尚自王朝而其行饗禮則天子爲賓諸侯之長

爲獻主用十二獻之禮以饗王也長諸侯亦不必
上公無公則大侯亦得爲長也

孟子上士倍中士中士倍下士此以爵之尊卑言者
也周禮弓長六尺有六寸上士服之弓長六尺有
三寸中士服之弓長六尺下士服之此以身之長
短言者也老子上士聞道勤而行中士聞道若存
若亡下士聞道大笑之此以人之賢愚言者也

左傳齊舊四量豆區釜鍾四升爲豆各自其四以登
於釜釜十則鍾此蓋齊量然耳非周量也周量以

考工記證之。臬氏爲量，深尺，方尺，其實一鬴。又曰：其鬴一寸，其實一豆。鬴卽釜也。豆卽斗也。深尺而爲釜一寸，而爲斗則釜之爲十斗明矣。蓋鬴卽斛之別名，亦名爲石，與齊量之釜不同也。梓人云：爵一升，觚三升，獻以爵而酬以觚，一獻而三酬則一斗矣。據此，則斗之爲十升明矣。與齊量之四升爲豆亦不同也。又自齊量而外，絕不聞有所謂區者，則區亦是齊之私制，他國無是也。蓋自巡狩之典，不舉同律度量衡之法，不行國異制，家殊俗久矣。

而註疏家乃必引此說彼爲準則如論語之與之
釜周禮之食不能人二釜皆云六斗四升不亦謬
乎

禮記獻粟者操量鼓管子云釜鼓滿則人槩之鼓之
爲量不知其實幾何恐亦非周量也孔子在衛衛
致粟六萬又原思爲宰與之粟九百雖不明其量
然以理論之必以釜斛計者蓋魯秉周禮所用必
是周量耳

同語犬戎樹惇能帥舊德樹惇必其君之名也玩文

勢可知

國語叙宣王不籍千畝而終之以戰於千畝似覺無謂蓋自宣王卽位卽不籍千畝至三十九年荒蕪已久而千畝遂成戰場矣故終之以此非無謂也五畝之宅說者皆云古者授宅二畝半在田二畝半在邑此說之極不通者古今皆習聞而莫知其非可笑也匠人營國不過方九里九九八十一爲方一里者八十一方一里之地爲九百畝以八十一倍竿不過七萬二千九百畝耳其中有王宮有左

祖右社前朝後市又道塗九經九緯每經塗濶九軌又九卿以至於三百六十官各有公署自公卿而下至於上中下士各有館舍如詩所云退食自公適子之館者又有賓館神祠作坊倉庫獄囚以上諸項處於王國之中必三分去二所存不過二三萬畝耳而六鄉之民已七萬五千家工商各不下萬家卽人授半畝勢必不給況二畝半乎孟子云願授一廛而爲氓禮記云儒有一畝之宮叅觀之足知二畝半之說爲妄矣以今世目驗之小民

有地二十步便可造屋三四間足以成家矣則古者一畝百步之地當必容四五家二畝半之地當必容十餘家也

考工記車人大車栢車羊車皆非駟馬車也牛車大則栢車中羊車小矣大車以行平地栢車以行山羊車以行宮中鄭註云羊善也則羊車未必駕羊漢書蹇蹇鹿車驅鹿車亦未必駕鹿晉武帝後宮乘羊車則真駕羊矣法華經有羊車鹿車牛車之說以喻三乘則似實駕羊駕鹿者蓋西域有此

制而後流入中國也

今人用安排字作安頓鋪排之義按莊子安排而去
化乃入於寥天一郭象云安於推移而與化俱去
也則安排乃作安於排解今人誤用

周禮小司徒上地家七人可任也者家三人中地家
六人可任也者二家五人下地家五人可任也者
家二人此上地中地下地正與上農夫食九人一
畧可參看蓋旣分田之後其丁多力勤者田自腴
家自富其人卽謂之上農夫其家卽謂之上地如

後世大戶中戶小戶云爾非謂給地之時卽定其上中下也若謂家七人者與之以上地家六人者與之以中地家五人者與之以下地則丁多力彊者皆獲肥饒而單丁下戶皆獲磽瘠純用情面上下其手豈先王分田制祿之意乎且人命不可期家七人者偶遇疾疫或損而爲五人豈可遂奪其上地而更給之以下地幼有時長長有時壯則家五人者可漸增至七人豈得遂收其下地而更給之以上地乎

公羊傳五版而堵八尺曰版堵四十尺五堵而雉二百尺百雉而城二萬尺

莊子逍遙遊篇大小二字是一篇眼目逍遙者見大則心泰也至於無已無功無名則大之至矣亦逍遙之極矣下文許由藐姑射大瓠諸章亦只說得一大字郭註云夫大小雖殊而放於自得之場則物任其性事稱其能名當其分逍遙一也此等議論固不謬乎莊子之意然首篇則尚未及此蓋古人立言亦必由淺以之深也讀書宜平心以味之

不必深求

野馬也至乃今將圖南

野馬者馬之在野者也野馬奔則塵埃起故曰以
息相吹也天非真有蒼蒼之色但遠而無極故視
以爲蒼蒼耳處下而平視野馬塵埃或謂之紅塵
或謂之黃埃若從九萬里之上視之則亦猶人之
視天亦見以爲蒼蒼而已此一畧不過發明鵬飛
之高而議論層波叠浪解者遂生支節

大椿

以八千歲爲春以八千歲爲秋聞此語者無不以爲誕矣然觀閩中有鐵蕉六十年一開花其開花也必以丁卯年推此而論則椿之八千歲一春秋桃之三千歲一花實六合之內焉知必無是事乎越人斷髮文身

斷司馬彪本作敦註云敦斷也今吳語以刀斫物曰敦應本此

昭文之鼓琴也

至載之末年

齊物論

枝策郭註以枝策假寐爲說然但言枝策未見有

假寐之意或云枝柱也策杖也舉杖以擊節禠琴也愚謂莊子以三子並稱各是一事且昭文與師曠未必同時焉得謂枝策爲擊節鼓琴乎竊謂技分也策籌也枝策謂算數也昭文精於琴師曠精於數惠施精於辨以至倦而據梧各有所好各有所明各自以爲有成實未始有成也載之末年猶言傳之後世也

夫三子者猶存乎蓬艾之間

日能照而有所不必照也德能治而有所不必治

也蓬艾之間日之照不及焉亦何損於日彼三子
亦猶是耳何足介介於胸中而不釋然乎若十日
並出萬物畢照則天下之大不祥也汝之德豈欲
進於日之照乎此章蓋卽察見淵魚者不祥之意
其名爲弔詭

弔讀爲的弔詭者其言似於詭異而實的當也

傳其常情

人間世

爲使之道不過傳其常情致君之命而已若巧言
偏詞必至於弄巧成拙傳言者殃矣叔向云子員

道兩國之言無私亦此意也使葉公知此則何憂
何慮何至朝受命而夕飲水乎

汝不知夫養虎者乎

順之則虎可以馴逆之則馬有時怒順之之法在
於平淡時其饑飽達其怒心而已逆之之端起於
驕寵如以筐盛矢以蜃盛溺是也知此術者卽以
見天殺之人可矣

禪傍

禪傍獨牆棺木也其義與單同不知古人何以不

讀爲單而讀作善音

迷陽卻曲

迷陽者當陽光盛時而若迷謂不用其明也卻不前也曲不直也謂遇事不肯直前也

與子產同師於伯昏無人

德克符

按列禦寇爲伯昏無人射禦寇鄭繻公時人則在子產後百餘年矣伯昏無人焉得爲子產師乎大抵莊子多寓言不必實有其事

爲天子之諸御至全德之人乎

不瓜剪不穿耳蓋言童女之未脩容者也今人家
女子出嫁始爲剃面卽此意欲爲貴人之御必求
全形之女若已爲人妻者則止於外不得混充役
使矣此正貴全形之意

言其與有足者

至於丘也

丘高地也凡有足者無不願遊焉如諺所云閒耍
也至人之以德爲循亦閒耍而已豈真以德爲真
而勤行之哉

夫藏舟於壑

至昧者不知也

少知所歸
藏舟於壑者自謂如藏山於澤之固也孰知或竊負之而走也人之愛其形而欲善吾生此藏舟之智耳不知老死之隨其後也若知生老始終無往不善則如藏天下於天下物莫能遁之矣

孟孫才居喪不哀

哀字當作哀若作哀則與上句中心不戚同不得列爲三者

有旦宅而無情死

旦宅猶言新宅也自生而死猶昨居舊宅而今旦

遷入新宅其情固未嘗死也

紛而封哉一以是終

應帝王

紛而封哉一五字爲句以是終三字爲一句紛而封哉一者謂萬事雖紛而其封域不出乎一也以是終者總結食豕如食人以下五句言列子守此學術以終其身也

蒿目而憂世之患

駢拇

蒿目謂如以蒿薰目而淚爲之流也

之八者乃始齮卷愴囊而亂天下也

在宥

欒卷謂欒切而卷懷之也愴囊謂傷殘而囊盛之也言割裂性命而於八者之中各珍藏其一也意治人之過也雲將曰然則吾奈何鴻濛曰意僊僊乎歸矣雲將曰吾遇天難願聞一言鴻濛曰意心養汝徒處無爲而物自化

上文意治人之過也下文意毒哉又下文意心養三箇意字皆讀作噫皆一字爲句皆嘆詞也鴻濛已極論嘆治人之過矣而雲將曰吾奈何是其志終在於治人也故鴻濛又嘆曰毒哉僊僊乎如俗

云快快活活回去罷言不必問也雲將終願聞一
言鴻濛乃又歎曰心養心養者言心不可不養也
汝徒處無爲而民自化云云數語養心之要也
有族有祖可以爲衆父而不可以爲衆父父天地
有族有祖言有衆必有君也可以爲衆父而不可
以爲衆父父言可爲一方之君而不可爲萬方之
君也謂齧缺才德狹小不可以配天也

鳥行而無彰

鳥行無彰猶言空中鳥迹也

三患莫至

三患謂老病死也一說卽佛氏所謂小三災刀兵饑饉疾疫也

苟有其實人與之名而弗受再受其殃吾服也恒服非以服有服

天道

苟有其實而不受其名則再受其殃矣苟無其實而受其名又何害焉呼牛呼馬任之而已服服從也言不與人爭辨也吾之服從人蓋常常如此吾雖服人而未嘗自多其服也有服與書經有其善

喪厥善有字同義

天下大駭儒墨皆起其作如有倫而今乎婦女何言哉

婦字當是歸字之誤而今乎歸四字爲句言大亂之本始於舜禹而今日乃其歸結也女讀作汝汝何言哉四字爲句

有弟而兄啼

有弟而兄啼謂母復懷妊而先生之子飲其乳則成病也醫家謂之繼病此亦物化自然之理

遙而不問掇而不跂

秋水

掇猶掇拾之頃言暫也猶言俯仰之間也

何貴何賤是謂反衍無拘而志與道大蹇何少何多是謂謝施無一而行與道參差

反衍謂反覆而續衍也既曰反覆則上者有時在下下者有時在上何貴賤之可定乎若拘而志則與道大蹇而窘澁難行矣謝施謂代謝而施用也既曰代謝則從無而有從有而無何少多之可定乎若一而行則與道參差而不可合矣

俄而柳生其左肘 至樂

柳字當作瘤

舜之將死真冷禹曰 山木

冷字當是令字之譌真令猶言實語也

夫子之問也固不及質正獲之問於監市履稀也每
下愈况 知此遊

此一段從來讀者皆以固不及質爲一句正獲之
問於監市履稀也爲一句所以爲之解者皆迂曲
不通余玩其文勢當以固不及質正獲之問於監

市履豨也十四字共爲一句質正卽周禮所謂質人掌成市之貨賄人民牛馬者獲則質正之名也監市猶監門市吏之賤者也履實也履豬估實豬價也每下謂先問其首而漸及於尻也况喻也曉也設市有賣豬者就質正評其價質正必問於監市監市則履豬首以至於尻舉其肥瘠則豬價曉然矣使問其首而不及於尻則豬之價未曉也豬之首尻有異而不可謂尻之非豬也道之上下有異而不可謂下之非道也質正之問知尻之爲豬

謂夫子之問不知尿溺之爲道固曰不及也

不知乎人謂我朱愚

庚桑楚

朱當作赧自稱其名也

券內者行乎無名券外者志乎期費行乎無名者惟庸有光志乎期費者唯賈人也人見其跂猶之魁然承上言畏鬼責者以內爲券者也畏人非者以外爲券者也券內者行乎無名其脩潛也券外者志於期費費用也言期於用盡之也行乎無名者惟庸有光言常常如此而自有光耀所謂闇然而日

章也志於期費者惟賈人也言如賈人之居貨期於盡販賣之而後已豈有所深藏而不出哉人見其跂猶之魁然跂謂跂足言時之暫也人見其暫時外飾似乎魁然豈能久哉

與物窮者物入焉與物且者其身之不能容焉能容人

與物窮者窮盡也盡心以爲人則物自入而就其度內矣與物且者且聊且也本無爲人之心而聊且以應人則人豈爲其所容哉上段言自修此段

言與物總之各有誠僞之分也

滅而有實鬼之一也

滅而有實謂形雖滅而精神不散猶言死而不亡也鬼之一也一字與左傳聰明正直而一也一字同義

臘者之有脆胾可散而不可散也觀室者周於寢廟又適其饌焉爲是舉移是

散棄去也脆胾非牲體之所貴然而不可棄去也當其食脆胾之時則牲體之是又移於脆胾矣偃

非寢廟之所貴當其適偃之時則寢廟之是又移於偃矣偃周禮作匿

介者移畫外非譽也胥靡登高而不懼遺死生也

郭云別者形殘不復以好醜在懷故移而去之愚謂訓介爲別古無此訓且別者之醜在足不在面何所嫌而移畫哉介字當作姘妒也婦之妒者并圖畫之美人而移去之意謂無好醜之相形可以外非譽矣而實不能外非譽也以不能忘已之醜也胥靡輕死故登高而不懼意謂可以遺死生矣

而實不能遺死生也以其不能忘胥靡也

君亦必無盛鶴列於麗譙之間無徒驥於錙壇之宮

麗譙華美之譙樓也喻目錙壇齋宮也喻心

徐無鬼

齊人謫子於宋者其命闔也而以完其求鉞鍾也以束縛其求唐子也而未始出域有遺類矣夫楚人寄而謫闔者夜半於無人之時而與舟人鬪未始離於岑而足以造於怨也

蹢躅蹢躅而行不便利之貌想當時方言謂人不伶
不儼巧者名之曰謫子猶今人曰猷子也齊人

有一歟子居於宋者每事顛倒如下所云也命名也完如漢書當髡者完爲城旦舂之完周禮墨者使守門完者使守積則閹者之完亦常法也完雖不髡鉗亦必其章服形狀與奴隸同有異乎良人者今此歟子其名爲人閹者而其狀不同於奴隸其顛倒一矣鉗鍾必有紐襻求者挈之而走可也何用束縛其顛倒二矣唐亡也佛書云功不唐捐唐子逃亡之子也求逃亡之子而不出域與不求何異其顛倒三矣有遺類矣猶言不知類也齊之

歠子如此楚人又有一歠子寄居而爲鬪者於夜半無人之時獨上人船舟人拒之遂與之鬪未始離於岑言足不離高岸蓋爲舟人所拒終不能上船適足以造怨而已楚之歠子又如此此皆自信其愚不可理喻五子之辯何以異是哉

湯得其司御門尹登恒爲之傳之從師而不囿得其隨成爲之司其名之名羸法得其兩見仲尼之盡慮爲之傳之

則陽

此一段自郭註而下從來解者皆牽合不通唯焦

氏老莊翼載徐士彰云三得其三爲之自相呼應
如此看庶乎可通可謂獨得其解矣今請因而詳
說之司御隨成兩見三者皆官號也門戶登恒仲
尼羸法皆人名也司御者相國之稱也相國之御
百官猶御者之御六馬故曰司御也門尹登恒卽
伊尹也從師而不囿所謂學焉而後臣之尊賢則
不惑也隨成者隨其成而案之蓋後世考功之職
也爲之司其名則賢否黜陟各當其所矣人之名
曰羸法蓋羸其姓法其名也按史記秦本紀大費

之玄孫曰費昌去夏歸商爲湯御以伐桀殆卽所謂羸法與兩見猶言明四目達四聰蓋盡其思慮以廣主之聰明也仲尼尼字當是虺字之譌商書所謂仲虺之誥是也爲之傳之蓋與伊尹俱爲湯傳也

欲惡去就於是橋起至橋運之相使窮則反終則始橋橋梁也橋梁之爲物以漸而高以漸而下凡陰陽之相照四時之相代皆象於此人之欲惡去就亦然今市人有上橋行市下橋行市之說曰橋起

曰橋運皆此意也下文窮則反終則始正所謂橋運也

季真之莫爲接子之或使

莫爲或使皆一曲之詞非大通之論也佛經云非因非緣非自然性論至於是則言默俱非千聖同堂亦無所措其喙矣故曰道物之極言默不足以載非言非默議其有極

莫知其所終若之何其無命也莫知其所始若之何其有命也有以相應也若之何其無鬼耶無以相應

也若之何其有鬼耶

寓言

命性靈也人之生也捨生趨生無有終窮豈可謂
無性靈耶然此性靈從何而來雖極力推原莫知
其所自始也又豈可謂有靈性耶應報應也福善
禍淫有其感必有其應豈可謂無鬼神耶然善有
時未必福惡有時未必禍又有不相應之時又豈
可謂有鬼耶此二義與前莫爲或使一義皆甚微
深妙之理雖聖人有所不知焉者此也

晉周之興有士二人處於孤竹一段

讓王

觀此段則伯夷歸周至岐陽而文王已沒見周德之衰遂去而餓死也孟子謂就養於西伯蓋亦論之未詳與

今夫此人以爲與已同時而生同鄉而處者以爲夫絕俗過世之士焉是專無主正所以覽古今之時是非之分也與俗化世

盜跖

言世人但見與已同時而生同鄉而處者而彼獨富貴焉則以爲絕俗過世之士矣是其胸中無主意無正見以遠覽古今知是非之分也惟與俗俱

化爲世俗之人而已蓋所見者近則不知貧富之外別有是非也

慘怛之疾恬愉之安不監於體怵惕之恐懼欣之喜不監於心

此承上論長生安體樂意之道不亦遠乎而言監視也猶覺知也言但知有富則慘怛恬愉不覺其孰安而孰危矣惡在其爲安體乎怵惕歡欣不覺其孰喜而孰憂矣烏在其爲樂意乎下言貴爲天子富有天下而不免於患則安在其爲長生乎

使而子爲墨者予也閻胡嘗視其良旣爲秋栢之實
矣列禦寇

不曰弟而曰而子憾父之詞也閻胡嘗視其良猶
言何不看我好處也旣爲秋栢之實矣言弟已
成材皆吾教誨之力也

一命而呂鉅

呂呂尚太公也鉅大也呂鉅言自視如太公之尊
大也

窮有八極達有三必形有六府

八者俱過人人之所忌也故必窮三者俱不若人
人之所憐也故必達此皆理之自然如形之有六
府也

炳燭齋隨筆終